

## P R A E F A T I O.

**E**x quo antiquos Artis nostrae scriptores lectitare coepi, (coepi autem, vt primum nomen meum inter medicinae studiosos professus sum) praeter HIPPOCRATEM & ARETAEVM, maxime in deliciis habui A. CORNELIVM CELSVM, idque non magis propter stili elegantiam, quam quod per multa vtilia ex eo didici.

Quum vero ex octo illis libris, quos de medicina composuit, nullus non bonae frugis plenus sit: tum praecipue primum, quo tuendae sanitatis ratio luculenter explicatur, ab insigni sua vtilitate commendandum esse censeo.

Equidem praecepta illa per amplius viginti annos, quibus artifex sum, omnibus, quorum valetudinem curabam, diligenter inculcaui, nec quemquam iis auscultasse vnquam poenituit, etsi non deerant, qui non nulla auxilia, vt aquam frigidam, infirmo capiti & stomacho, neruisque & articulis dolentibus, infusam, temeraria & periculosa, alia, vt claram lectionem, & pilam, cum similibus exercitationis generibus, futilia, & histrione, quam Medico, digniora esse clamitarent. Quae conuicia tamen eo magis contemsi, quod boni effectus, qui ex vsu illorum consequerentur, homunciones istos mox pudore conficiebant.

Praeceptorum autem CELSIANORVM praestantiam quum plane exploratam atque perspectam haberem, non paucis adolescentibus, qui artis salutaris studio se dediderant, auctor fui, vt volumen illud non modo legerent, sed etiam edicerent. Fueruntque, qui, vberimos fructus ex hoc consilio se percepisse, postea grati agnoscerent & testarentur. Ipse vero, quum otio nuper abundarem, neque valetudo, quae per hiemem fere paullo im-

becillior mihi esse solet, pati videretur, vt maius aliquid molirer, nihil, quod operae non foret, me facturum existimaui, si totum libellum numeris poëticis adstringerem, siquidem inter omnes constat, quaecumque praecipuntur, si carmini sint intexta, & plus ponderis habere, & memoriae promptius mandari, tenaciusque in ea haerere.

Operam dedi, vt CELSI mentem vbique quam adcuratissime exprimerem, & ideo, quoad id facere licuit, ipsa eius verba vsurpauit. Quum vero vulgata scriptura pluribus locis in mendo cubet, ante omnia hanc emendandam esse arbitratus sum. Qua in re quum exiguum in libris, tum editis, tum scriptis, esset praesidium, (omnes enim codices manu exaratos, quos Viri docti adhuc inspexerunt, ex vna sola membrana, & hac quidem vitiosa, propagatos esse, firmissimis, omnique exceptione & cauillatione maioribus argumentis olim demonstraturi sumus) quum igitur libri parum me iuuarent, saepe ad coniecturas decurrere, & CELSI nostri verba ex ingenio refingere me oportuit. Quod vtrum propitia, an irata Minerua, fecerim, Critici, sed ii rerum medicarum haud rudes, diiudicent.

Contextui, a me emendato, subiecta est varietas lectionis ex LOMMII, LINDENII, KRAVSII, TARGAE, & VALARTI editionibus, vt quae eruditorum & studiosorum manibus potissimum versari soleant. Quo ipso factum quoque est, ne vulgata scriptura, quam illae fere exhibent, desideretur.

Earundem editionum lectiones, sicubi ab iis, quas receperam, vel tantillum discrepabant, etiam versibus expressi, & suo quamque loco elegis meis subieci.

Emendationum mearum rationes, quas in promptu iam habeo, alio tempore me redditurum esse spondeo.

CAP.